

徐霞客遊記大觀

上海掃葉山房發行

徐氏年譜之大概

上海華泰大書局發行

徐霞客遊記大觀卷七

江陰徐宏祖霞客著

子別姓 寄介立 輯

滇遊日記 一缺

季會明曰。乙酉七月。余宗人季楊之。避難於舅氏徐虞卿處。顧余於館。見霞客遊記。攜滇遊一冊去。不兩日。虞卿為盜所殺。火其廬。記付祖龍。是書遭其殘缺。亦刼數也。今全集唯義興曹駿甫有之。初駿甫亦好遊。慕霞客之高。聞其死。詣弔。兼求遺書校錄。子依以原稿付去。逾一年而還。今其全集必存。訪而得之。甚易也。又詩稿一冊。仲昭付梓人陳仲鄰。仲鄰遇難。稿亦散失。然其詩另為一冊。與記不相屬。缺之猶可。記缺其一。便非完璧。當急求之。

陳體靜曰。余嘗考介翁於宜興史氏。購得曹氏底本。而此冊中。亦僅載遊太華顏洞數小記而已。其間自五月初九至八月初六。凡八十七日日記。仍不可得。豈駿甫所錄。先已非全文耶。文章缺陷。信乎有數存焉。為之浩歎。

鎮按滇一日記。已為燼簡。介翁叢殘補治。定知非輯綴假合也。或者一并汰之。直將太華數節別作記外贅筆。而滇一則仍闕如。豈復成令丙耶。茲從陳本編正。

遊太華山記

出省城西南二里下舟。兩岸平疇夾水。十里田盡。荏葦滿澤。舟行深綠間。不復知為滇池。巨流是為草海。草間舟道甚狹。遙望西山繞臂東出。削崖排空。則羅漢寺也。又西十五里。抵高嶢。乃捨舟登陸。高嶢者。西山中遜處也。南北山皆環而東出。中獨西遜。水亦西逼之。有數百家倚山臨水。為迤西大道。北上有傳圍。圍西上五里。為碧雞關。即大道達安甯州者。由高嶢南上為楊太史祠。祠南至華亭太華。盡於羅漢。即碧雞山南突為重崖者。蓋碧雞山自西北亘東南。進耳諸峰。由西南亘東北。兩山相接。即西山中遜處。故大道從之。上置關。高嶢實當水準焉。余南一里。飯太史祠。又南過一邨。乃西南上山。共三里。山半得華亭寺。寺東向。後倚危峯。草海臨其前。由寺南側門出。循寺南西上。南踰支隴入腋。共二里。東南升嶺。嶺界華亭太華兩寺中。而東突者。南踰嶺。西折入腋。湊間上為危峯。下盤深谷。太華則高峙谷東。與行處平對。然路必窮極西腋。後乃東轉出。腋中懸流雨。派墜石窟。幽峭險仄。不行此徑不見也。轉峽又東盤山嘴。共一里。俯瞰一寺在下壑。乃太平寺也。又南一里。抵太華寺。寺亦東向。殿前夾埽皆山茶。南一株尤巨異。前廊南穿廡入閣。東向瞰海。然此處所望猶止及草海。若濛濛浩蕩。觀當更在羅漢寺南也。遂出南側門。稍南下。循塢西入。又東轉一里半。南踰嶺。嶺自西峯最高處東垂下。有大道直上。為登頂道。截之東南下。復南轉。

遇石峰嶙峋。南擁輒從其北。東向墜土坑下。共一里。又西行石叢中。一里。復上躡崖端。盤崖而南。見南崖上下如蜂房燕窩。累累欲墮者。皆羅漢寺南北庵也。披石隙稍下。一里抵北庵。已出文殊巖上。始得正道。由此南下。為羅漢寺正殿。由此北上。為朝天橋。橋架斷崖間。上下皆嵌崖。此復斬崖中墜。橋度而南。即為靈官殿。殿門北向。臨橋。由殿東側門下。攀崖躡峻。愈上愈奇。而樓供純陽帝而殿供元帝而閣供玉皇而宮名抱一皆東向。臨海。嵌懸崖間。每上數十丈。得斗大平崖。輒杙空架隙成之。故諸殿俱不巨。而點雲綴石。互為披映。至此始擴然全收水海之勝。南崖有亭前窅。北崖橫倚樓。樓前高柏一株。浮空漾翠。並樓而坐。如倚危檣上。不復知有崖石下藉也。抱一宮南削崖上。杙木棧穿石穴。棧懸崖樹穴透崖隙。皆極險峭。度隙有小樓粘石端。寢龕炊竈皆具。北庵景至此而極。返下朝天橋。謁羅漢正殿。殿後崖高百仞。崖南轉折間。泉一方。渟崖麓。乃朝天橋迸縫而下者。曰勺冷泉。南踰泉。即東南折。其上崖更崇。列中止瀦坪一縷。若腰帶。下悉隕阪崩崖。直插海底。坪間梵宇仙宮。雷神廟三佛殿壽佛殿關帝殿張仙祠真武宮次第連綴。真武宮之上。崖愈傑竦。昔梁王避暑於此。又名避暑臺。為南庵盡處。上即穴石小樓也。更南則庵盡而崖不盡。穹壁覆雲。重崖拓而更合。南絕壁下。有猗蘭閣址。還至正殿。東向出山門。凡八折。下二里抵山麓。有邨氓數十家。俱網罟為業。邨南即

龍王堂前臨水海。由其後南循南崖麓。邨盡波連。崖勢愈出。上已過猗蘭舊址。南壁愈拓削。一去五里。黃石痕掛壁下。土人名為掛榜山。再南則崖迴嘴突。巨石壘空。嵌水折成壘。南復分接屏壁。雄峭不若前。而兀窅離奇。又開異境。三里下瞰海涯。舟出沒石隙中。有結茅南崖側者。亟懸仄徑下。得金錢泉。泉自西山透腹出。外分三門。大僅如盎。中崆峒。悉巨石欹側。不可入。水由盎門出。分注海。海中細魚溯流入洞。是名金錢魚。魚大不踰四寸。中腴脂。首尾金一縷如綫。為滇池珍味。泉北半里有大石洞。洞門東瞰大海。即在大道下。崖傾莫可墜。必迂其南。始得逶迤入。即前所望石中小舟出沒處也。門內石質玲透。裂隙森柱。俱當明處。南入數丈。輒黯。覓炬更南。洞愈崇拓。共一里。始轉而分東西向。東上三丈止。西入窈窕莫極。懼火炬不給。乃出。上山返抱一宮。問山頂黑龍池道。須北向太華中。乃南轉。然池實在山南。金錢泉絕頂。以此地崖崇石峻。非攀援可至耳。余輒從危崖歷隙上。壁雖峭。石縫多稜。懸躍無不如意。壁紋瓊葩瑤莖。千容萬變。皆目所未收。素習者惟牡丹。枝葉離披。布滿石隙。為此地絕邁。乃結子垂垂。外綠中紅。又余地所未見。土人以高遠莫知採鑒。第曰山間野藥。不辨何物也。攀躋里餘。遂躡巔。則石萼鱗鱗。若出水青蓮。平散竟地。峰端踐側。鈎而南。惟西南一峰最高。行峰頂四里。凌其上。為碧雞絕頂。頂南石萼駢叢。南墜又起一

突兀峰高少遜之。乃南盡海口山也。絕頂東下二里。已臨金綫泉之上。乃於聳崖間觀黑龍池而下。

滇中花木記

滇中花木皆奇。而山茶山鵲為最。山茶花大逾碗。攢合成球。有分心卷邊。軟枝者為第一。省城推重者。城外太華寺。城中張石夫所居。朶紅樓。樓前一株挺立。三丈餘。一株盤垂幾及半畝。垂者叢枝密幹。下覆及地。所謂柔枝也。又為分心大紅。遂為滇城冠。山鵲一花具五色。花大如山茶。聞一路迤西。莫盛於大理永昌境。花紅形與吾地同。但家食時。疑色不稱名。至此則花紅之實。紅豔果不減花也。

遊顏洞記

臨安府顏洞凡三。為典史顏姓者所開。名最著。余一至滇省。每飯未嘗忘鉅鹿也。遂由省中南過通海縣。遊縣南之秀山。上一里半。為灝穹宮。宮前巨山茶二株。曰紅雲殿。宮建自萬歷初。距今裁六十年。山茶樹遂冠南土。又南抵臨安府。城南臨瀘江。此江西自石屏州異龍湖來。東北穿出顏洞。而合郡眾水。亦以此洞為洩水穴也。於是覓一導遊者。於城東接待寺。顏洞大道。當循城而南。渡瀘江橋。導者從寺前隔江東北小路行。遂不得渡瀘江。東觀三溪會合處。由寺北循塘岸東行。塘東皆紅蓮覆池。

密不見水。東北十五里。渡賽公橋。水自西北來。東南入瀘。又五里上山。為金雞哨。哨南瀘江會諸水。由此東入峽。峽甚逼。水傾其中。東抵洞口。尚里餘。望洞頂石崖雙壁。如門對峙。洞正透其下。重岡迴夾之。不可得見。求土人導入。皆曰。水漲流急。此非遊時。若兩月前水涸。可不橋而入。今即有橋。亦不能進。況無橋耶。橋非一處。每洞中水深處。輒架木以渡。往例按君來遊。架橋費且百金。他費亦百金。土人苦之。乘普酋兵變。託言洞東即阿迷境。叛人嘗出沒此。遂絕官長遊洞者。余必欲一至洞門。土人曰。須渡江南岸。隨峽入。所謂瀘江橋大道也。始悔為導者悞。乃捨水洞。覓南明萬象二陸洞。從峭東下坡。復上山登頂。東瞰峽江環峽東入。洞門即在東峽下。余所登山處。正與其上雙崖平對。門猶為曲掩。但見峭崖西向。湧水東傾。搗穴吞流之勢。已無隱形矣。東北三里。踰嶺脊下山二里。則極東石壁迴聳。如環半城。下開洞門北向。余望之有異。從之直下。一里抵峽中。又一里半抵東壁下。稍南上。洞門廓然。上大書雲津洞。蓋水洞中門也。遊顏洞以雲津為奇。從前門架橋入。出後門約四五里。暗中傍水行。中忽闢門延景。其上又絕壁迴環。故自奇絕。余不能入其前洞。而得之重嶠絕巘間。且但知萬象南明。不復知有雲津也。誠出余意外。遂瞰洞而下。洞底水從西南穴中來。盤門內而東。復入東南穴去。余下臨水湄。徑之。水濶三丈。洞高五六丈。而東西

當門透明處徑可二十丈。但水所出入直逼外壁。故非橋莫能行。出水西穴漸暗。不可遠窺。東為水入穴處。稍旁拓。隔水眺之。中垂列乳柱。繽紛窈窕。復上出洞外。上眺東南北三面。俱環壁無可上。仍西出舊道。北上山東一里。踰嶺已陟東壁。迴環上嶺。塢中東向。一里。其地南北各起層峰。石崖時突。萬象洞即在北崖上。乃導者妄謂在南崖下。直下者一里。抵南崖。一洞東向。高四丈。水從中湧出。兩崖角起。前對為峽。水出洞破峽。勢極雄壯。蓋水洞後門也。又東二里。抵老鼠邨。執途人問之。萬象洞在西北嶺上。即前所從下山處。洞甚深。歷降而下。底與水洞通。余欲更至洞門。晚色已合。去宿館尚十里。念此三洞。慕之數十年。趨走萬里。乃至而叛黨阻之。陽侯隔之。太陽促之。導人又誤之。生平遊履。斯為最阨矣。

隨筆二則

黔國公沐昌祚卒。子啟元嗣爵。邑諸生往祭其父中門。啟元一生翹首內望。門吏杖箠之多。士怒。亦箠其人。反為眾桀奴所傷。遂愬於直指金公。公諱城。將逮諸奴。奴聳啟元先疏。誣多士。事下御史。金逮奴如故。啟元益嗔。徵兵祭纛。環直指門。發巨砲。恐之。金不為動。沐遂掠多士數十人。毒痛之。囊其首於木。金戒多士毋與爭。急疏聞。下黔督張鳴鶴勘。張奏以寔。時魏璫專政。下調停旨。而啟元愈猖狂不可制。母宋夫人懼。

新世緒泣三日以毒進啟元隕事乃解宋夫人疏請孫穉未勝爵服乞權署名俟長賜襲會今上登極憐之輒賜勅實授即今嗣公沐天波時僅歲一周支也

普名勝者阿迷州土寇也祖者輅父子為亂三鄉維摩問萬歷四十二年廣西郡守蕭以裕調寧州祿土司兵合勦一鼓破之輅父子俱就戮始復維摩州開三鄉縣時名勝走阿迷寧州祿洪欲除之臨安守梁貴夢郡紳王中丞撫民畏寧州強留普樹之敵曲庇名勝初猶屯阿迷境後十餘年兵頓強殘破諸土司遂駐州城盡奪州守權崇禎四年撫臣王伉憂之裹毡笠同二騎潛至州悉得其叛狀疏請勦上命川貴四省合勦之石屏龍土司兵先薄漾田為所殲三月初八日王中丞親駐臨安布政周世昌統十三參將將本省兵萬七千人逼沈家墳賊命黎亞選扼之不得進相持者二月五月初八日亞選自營中潛往為名勝壽醉返營一童子洩其事於龍龍與王土司夜劫之遂斬黎進薄州城環圍四月卒不下時州人廖大亨任職方郎賊恃為奧援潛使使入京縱反間謂普實不叛王撫起釁徵功百姓悉靡爛于是部郎疏論普地不百里兵不千人即叛可傳檄定何騷動大兵為而王宮諭錫袞楊庶常繩武各上疏言宜勦事下樞部議先是王撫疏名勝包藏禍心已久前有司養疽莫發奸致成難圖蔓草上因切責前撫按而前撫閱洪學已擢冢宰懼勿能自解即以飛語

愆恩大司馬。大司馬已先入部。郎言遂謂名勝地不當一縣。撫按比周。張大其事勢。又延引日月。徒虛糜縣官餉。疏上。嚴旨逮宥。及按臣趙世龍。十月十五。撫按具臨安就逮。十二月十八。周世昌中銃死。十三參將悉戰沒。五年正月朔。賊悉兵攻臨安。詐郡括萬金犒之。受金。攻愈急。迨十六。城垂破。賊忽退師。以何天衢襲其穴也。天衢。江右人。居名勝十三頭目之一。見名勝有異志。心不安。妻陳氏力勸歸中朝。天衢因乞降。當道以三鄉城處之。今遂得其解圍力。後普屢以兵攻三鄉。各相拒。無所勝。乃退兵。先修祖父怨於寧州。方攻寧時。洪已奉調中原。其母集眾目人犒五金。京青布二。各守要害。賊不得入。後洪返。謂所予太重。責之金。諸族目悉解體。賊謀知乘之入。洪走避撫仙湖孤山。州為殘破。歲餘。洪復故土。鬱鬱死。賊次攻石屏州。及沙土司等十三長官。悉服屬之。志欲克維摩州。南魯白城。即大舉。魯白城在廣南西南七日程。臨安東南九日程。與交趾界。城天險。為白彝所居。名勝常曰。進圖中原。退守魯白。吾無憂矣。攻之三年。不能克。七年九月。忽病死。子福遠方九歲。妻萬氏多權畧。威行遠近。當事者姑以撫了局。釀禍至今。自臨安以東。廣西以南。不復知有明官矣。至今臨安不敢一字指斥。旅人詢及者。輒拊口相戒。府州文移。不過虛文。予過安莊。見為水西殘破者。各各有同仇志。不惜為致命。而此方人人沒齒無怨言。不意一婦人威略乃爾。

南包沙土司。抵蒙自縣。北包彌勒州。抵廣西府。東包維摩州。抵三鄉縣。西抵臨安府。皆其橫壓之區。東唯三鄉向天衢。西唯龍鵬龍在田。猶與抗鬪。餘皆聞風懾伏。有司為之籠絡。仕紳受其羈勒者。十八九。王伉以起釁被逮。後人苟且撫局。舉動如此。朝廷可謂有人乎。夫伉之罪。在悞用周世昌。不諳兵機。彌連數月。兵久變生耳。當時止宜責其遲留。策其後效。臨敵易帥。且不可。遽就軍中逮之。亦太甚矣。嗟乎。朝廷於東西用兵。事事如此。不獨西南彝也。

戊寅八月初七日。余作書投署府何別駕。求廣西府志。是日其誕辰。不出堂。書不得達。入堂閱其四境圖。見盤江自其南界西半入境。東北從東界之北而去。不標地名。無從知其何界也。

初八日。何收書欲相見。以雨不往。

初九日。余令顧僕辭。何不見。促其志。彼言即送至。而終不來。是日復大雨不止。

初十日。何言覓志無印就者。已復命殺青矣。是日午霽。始見黃菊大開。

菊惟黃色。不大。又有西番

菊

廣西府。西界大山。高列如屏。直亘南去。曰草子山。西界即大麻子嶺。從大龜來。

者。東界峻逼。而西界層疊。北有一石山。森羅於中。連絡兩界。曰發果山。東支南下者。結為郡治。西支橫屬西界者。有水從穴湧出。甚巨。是為瀘源。經西門大橋。而為矣。邦

池之源者也。

通海從穴湧出。此海亦從穴湧出。然此海南山復橫截。仍入大守塘山。穴中尤為異也。廣福僧言。此水入穴。即從竹園邨北龍潭出。未知果否。

恐龍

潭自是錫岡北湧水。此未必合出也。矣。邦池俗名海子。又曰龍。此瀘江。非廣中瀘江也。瀘江在南。而此水亦竊其名。不知何故矣。邦池之南。復

有遠山。東西橫屬。則此中亦一南北中窪之坑。而水則去來皆透於穴矣。此郡山之

最遠者也。

發果山。圖若貫珠。橫列郡後。東下一支曰奇雀峯。則學宮所托。西下一

支曰鐵龍峯。則萬壽寺所倚。而郡城當其中環處。城之東北亦有一小石峰在其中。

曰秀山。上多突石。前可瞰湖。後可攬翠。城南瀕湖。復突三峯。東即廣福。曰靈龜山。中

峰最小。曰文筆峰。建塔於上。而西峯橫若翠馬。

即名翠屏。

此郡山之近者也。秀山前有伏

波將軍廟。後殿為伏波像。前殿為郡守張繼孟祠。

張扶風人。以甲科守此。壬申為普酋困。城岌岌矣。張奮不顧身。固保

城隍。普莫能破。城得僅存。先是張夢馬伏波示以方畧。後遂退賊。二月終。親漁息宰河招撫焉。州人服其膽畧。賊稱為捨命王云。

新寺。

即萬壽寺。當發

果西垂之南。其後山石嶙峋。為滇中所無。其寺南向。後倚峭峰。前臨遙海。亦此中勝

處。前有玉皇閣。東為城隍廟。俱在城外。

瀘源洞。在城西北四里。新寺後山西盡環

塢而北。其中亂峯雜沓。綴以小石岫。皆削辦駢枝。標青點翠。北環西轉。而瀘源之水。

湧於下穴。瀘源之洞。闢於層崖。有三洞焉。上洞東南向。前有亭。下洞南向。在上洞西

五十步。皆在前山之南崖。後洞在後山之北岡。其上如智井。從井北墜穴而下。二十

步。底界而成脊。一穴東北下而小。一穴東南下而廓。此三洞之分向也。其中所入皆

甚深。秉炬穿隘。屢起屢伏。乳柱紛錯。不可窮詰焉。

十一日。大霧。上午出西門。過城隍廟。玉皇閣前。西一里。轉新寺。西峰之嘴而北。又北一里。見西壑。漲水盈盈。而上洞在其西北矣。由岐路一里。抵山下。歷級遊上洞。望洞西。有寺殿兩重。入憇而淪水為餐。余因由寺西觀水洞。還寺中索炬。始知為洞有三。洞皆須火深入。下午強索得炬。而火為顧僕所滅。遍覓不可得。遙望一邨。在隔水之南。漲莫能達。遂不得為深入計。聊一趨後洞之內。披其外局。還入下洞之底。探其中門而已。仍從舊路歸。北入新寺。抵暮而返。

十二日。早促何君志。猶曰。即送至。坐寓待之。擬一至即行。已而竟日復不可得。晚謂顧僕曰。志現裝釘。俟釘成帙。即來候也。余初以為廣西郡人。必悉盤江所出。遍徵之。終無諳者。其不知者。反謂西轉彌勒。既屬顛倒。其知者。第謂東北注羅平。經黃草壩下。即莫解所從矣。間有謂東南下廣南。出田州。亦似揣摩之言。靡有確據也。此地至黃草壩。又東北四五日程。余欲從之。以此中淹留日久。迤西之行。不可遲姑。留為歸途之便。廣西府鸚鵡最多。皆三鄉縣所出。然止翠毛丹喙。無五色之異。三鄉縣。乃甲寅蕭守所城。維摩州。州有流官。祇居郡城。不往州治。二處皆藉何天衢守之以與。普拒。廣福寺。在郡城東二里。言雙鄉。在矣邦池之東南。與之對。而彌勒州。

在郡西九十里。一統志乃注寺在彌勒東九十里。鄉為彌勒屬何耶。豈當時郡無附郭三州各抵其前為界。故以屬之彌勒耶。然今大麻子哨西何以又有分界之址也。十三日。中夜聞雷聲。達旦而雨。余初欲行屢矣。而日復一日。待之若河清焉。自省至臨安。皆南行。自臨安抵石屏州。皆西北。自臨安抵阿迷。皆東北。自阿迷抵彌勒。皆北行。自彌勒抵廣西府。皆東北。

十四日。再令顧僕往促志。余束裝寓中以待。乍雨乍霽。上午得回音。仍欲留至明晨。云乃携行李出西門。入玉皇閣。閣頗宏麗。中乃銅像。而兩廡塑羣仙像。極有生氣。正殿四壁畫亦精工。遂過萬壽寺。停行李於其右廡。飯後登寺左鐵龍峯之脊。石骨稜稜。皆龍鱗象角也。志又稱為天馬峯。以其形似也。既下。還寺中。見右廡之北有停柩焉。詢之。乃吾鄉

徽郡游公柩也。游諱大勳。任廣西三府。征普時。游率兵屯郡南海梢。以防寇之衝突。四年四月。普兵忽乘之。游竟沒於陣。今其子現居其地。不得歸。故停柩寺中。余為慨然。是晚遇李如玉。楊善居諸君。作醮寺中。屢承齋餉。僧千松亦少解人意。是晚月頗朗。

十五日。余入城。探游君之子。令顧僕往促何君。上午出西門。遊城隍廟。既返寺。寺中男婦進香者接踵。有吳錫爾者。亦以進香至。同楊善居索余文。各携之去。約抵暮馳

還抵午。顧僕回言。何君以吏釘志久遲。撲數板。限下午即備。料不過期矣。下午。何命堂書送志及程儀。至。余作書謝之。是晚為中秋。而晚雲密布。既暮而大風忽吼。僧設茶於正殿。遂鋪餽而卧。

十六日。雨意霏霏。不能阻余行色。而吳楊文未至。令顧僕往索之。既飯。楊君携酒一樽。侑以油餅熏鳧。乃酌酒而携鳧餅以行。從玉皇閣後。循鐵龍東麓而北。一里。登北山而上。一里。逾其坳。即發果山之脊也。志又謂之九華山。蓋東峰之南下者。為奇鶴。為學宮所倚。西峯之南下者。為鐵龍。為萬壽寺之脈。中環而南。突於城中者。為鍾秀山。其實一山也。從嶺上平行。又北三里。始見瀘源洞在西。而山脊則自東界大山。橫度而西。屬於西界。為郡城後倚。然瀘源之水。穿其西穴而出。亦不得為過脈也。從嶺北行。又五里而稍下。有峭在塢之南岡。曰平沙峭。郡城北之鎖鑰也。其東即紫微之後脈。猶屏列未盡。其西則連峰蜿蜒。北自師宗南下。為阿廬山。界塢中之水。而中透瀘源者也。由峭前北行。塢中六里有溪。自北而南。小石梁跨之。是為矣各橋。溪水發源於東西界分支處。由梁下西注南轉。塢窮而南入穴。出於瀘源之上流也。又北六里有邨在西山之半。溪峽自東北來。路由西北上山。一里。躡嶺而上。二里。遂逾西界之脊。於是瞰西塢行。塢中水浸成壑。有邨在其下。其西復有連山。自北而南。與此界

又相持成峽焉。從嶺上又北四里，乃西北下西峽中。一里抵麓，復循東麓北行十五

里。復有連岡屬兩界之間，有數家倚其上，是為中大鋪。有公館焉。按志：師宗南四十里，有額勒哨，當即

此飯仍北行峽中。其內石峯四五，離立崢嶸。峽西似有溪北下，路從峽東行。兩界山

復相持，而北塢中皆荒茅沮洳，直抵師宗，寂無片椽矣。聞昔亦有邨落，自普與諸彝

出沒莫禁，民皆避去，遂成荒徑。廣西李翁為余言：師宗南四十里，寂無一人，皆因普

亂民不安居。龜山督府今亦有普兵出沒，路南之道亦梗不通，一城之外皆危境云。

龜山為秦土官寨，其山最高，為彌勒東西山分脈處。其西即北屬陸涼，西屬路南，為

兩州間道。向設督捕城，今漸廢弛。秦土官為昂土官所殺，昂復為普所擄。今普兵不

時出沒其地，人不敢行。往路南徵江者，反南迂彌勒，從北而向革泥關焉。蓋自廣西

郡城外皆普氏所攝服，即城北諸邨小民稍溫飽，輒坐派其貲以供，如達即全家擄

掠而去。故小民寧流離四方，不敢一鳴之有。北行二十里，經塢而西，從塢中度一橋，

有小水自南而北，涉之轉而西北行。暝色已合，顧僕後，余從一老人一童子前行，躑

躑昏黑中。余高聲呼顧僕，老人輒搖手禁止。蓋恐匪人聞聲而出也。循坡陟坳十里，有

一尖峯當坳中，穿其腋復西北行。其處路甚濶，蹊水交流，路幾不辨。後不知顧僕趨

何所。前不知師宗在何處，莽然隨老人行。而老人究不識師宗之遠近也。老人初言

隨路有邨可止，余不信。至是不得邨，并不得師宗，余還叩之。老人曰：余昔過此，已經十四年前，此隨處有邨，不意竟瘡痍莫辨。久之，漸聞犬吠聲，隱

隱真如空谷之音。知去人境不遠，過尖山共五里，下涉一小溪，登坡遂得師宗城焉。

霞客遊記